

寶雞縣志

卷一

卷二

卷三

卷四

寶雞縣志序

志者學之師也才者學之徒也學者不患才之不贍而患志之不立周禮小史掌邦國之志志隸於史志者志也志定而後有言默則立象語則成文述千載之上若共一時辨殊俗之類若與同室自班馬陳范以至歐陽諸史所爲章志貞教表微闡幽藏名山而爲不朽之業者咸有以鑒其志之所存史既有之志亦宜然乾隆五十年之夏余奉

命告祭吳嶽江濱由隴入蜀來往道過寶雞邑令鄧簣山明府先示其所修洵陽志畢中丞序其書所謂勤求政本者是也旣而事竣

寶雞縣志
節旋明府又持其脫稿寶雞志來告曰將鋟諸木乞言以弁其端
余讀洵陽志事瞻思深殷然見守官之法焉寶雞志事核文古斐
然見學史之裁焉詩序曰詩者志之所之也在心爲志是以一國
之事繫一人之本謂之風風行天上君子以懿文德風行地上先
王以省方觀民設教志也者所以懿文德而宣民教也自志屬公
局其權易撓其職易侵不止如後漢東觀之所謂著述無主條章
靡立而已明府以地治之職成兩邑之書雖假草創討論之勞而
其閉閣勤思于役橐筆舉夫建置之廢興與山川之險易民生之
豐儉士習之浮正俗尙之澆淳賦役之厚薄衷諸志而有言因言
成風所爲沐浴

膏澤而詠歌勤苦者思之也精故言之也切讀其書以求其志亦可卽其志以徵其所著矣是爲序

乾隆五十年歲次乙巳仲夏月中澣

賜進士及第資政大夫內閣學士兼禮部侍郎仁和胡高望譔

寶雞縣志目錄

浮梁鄧夢琴纂修

第一卷

沿革

疆域附

第二卷

山川

第三卷

建置

學校營制附

第四卷

渠堰

關梁附

第五卷

賦役

第六卷

祠祀

寺觀附

第七卷

秩官

第八卷

選舉

第九卷

宦績

第十卷

人物上

第十一卷

人物下

第十二卷

風俗

物產附

第十三卷

錄史

第十四卷

古蹟

第十五卷

金石

第十六卷

祥異

志餘附

寶雞縣志

凡例

一舊志始修於前明萬歷三十六年朱令炳然繼修於崇正十三年嚴令夢鸞

國朝順治六年薛令光前倡始編輯爲卷二十其書不傳十四年周令愜續修之至康熙二十四年何令錫爵重修之今所傳書三卷者是也其書雖荒略鄙舛原可等之自鄮無譏至乾隆二十九年許令起鳳開局纂修自矜書倍事詳則踈鑿矣其勢不得不改修前局士友尙有存者旣面告以所以然共諒鄙衷非敢撫拾前人輕議其後也

寶鼎志
一喬三石耀州志凡例云事涉國典海內所共有者不書星野古以國論蓋括地遠矣亦不書洵陽志輿鬼張柳之次實分畛域首列分野一門彼此可以互見不必重衍前說也

一號縣分治元初始省入寶雞不知沿革何以未經列入茲采經史及水經地志諸書考據原委古來郡邑分合較若列眉省其橫表壁壘一新矣

一南方志乘局開集賢館坐嘯畫諾人自爲荀袁家自爲政駿矣旣而阿好誣先各立私傳劉知幾所云此實家諜非關國史是也長吏懲是之故閉閣簪筆虛懷謀野人物一志除考證史傳碑記外新增傳者不過十餘人共矢矜慎未敢私

千其從前之泛濫無歸者稍加修飾庶幾人貌榮名各從其所安乎

一洵陽縣志故有錄史一門本紀列傳分次平列閱者微嫌篇幅之隔茲則經年緯月錄其實有關於邑事者本紀高書一格列傳分註其下事以類求非敢竊取紫陽綱目之義也

一邑人士遺集俱載本傳簡末不必另立藝文一則備列書名蓋名山藏少難彙集也然舊志藝文頗屬夥頤其顯然牴牾者亟宜刪削如所載岑參虢州後亭送李判官使晉絳絕句流寓傳又載其虢州東亭送李司馬歸扶風別廬詩不知唐之虢州屬宏農郡在今河南盧氏縣非邑南之虢川也流寓

傳又載賈島雲蓋寺絕句不知浪仙所寓者是鎮安西北四十里之雲蓋寺非邑西南之廢寺也至蘇東坡題虢國夫人夜遊圖亦列藝文則不知其指歸矣邑南虢川係諸葛武侯由漢中出斜谷之間道前人遊虢川記乃以魏延所云之子午谷當之則東西莫辨矣其餘郢書燕說可以類推也

一山爲邑鎮川隨山導邑之山川渭水中流吳嶽迤其北終南亘其南表以爲限萬壑千巖分支別派仍然聚米可數至於金石考古事言尤資補自羽陽瓦篆以下暨長春成道碑視舊志較詳矣其扶筇躡屨拭鐘捫石邑文學楊生景美高生元掄王生步瀛楊生儲精王生濟壬李生步蓮王生希鑿高

生其節韓生慶雲茹生含芳實有勞焉

一邑中舊宦頗有藏書之家俱已散軼無可乞假仍就行笥所有者綴葺成帙自愧疎略其編纂草創大半成於安康董孝廉詔之手兒子傳安亦分任之分校勦事者則浮梁鄭文學鳳儀暨從姪傳牧也至斟酌損益仍以己意折衷其間蓋

重熙累洽大有頻登沐浴詠歌揚休導美自一隅達之天下以俟輶軒之采云爾

寶雞縣志卷之一

沿革

疆域附

寶雞唐縣名

本朝仍之屬鳳翔府隸陝西省布政司
其在上古曰陳倉爲

庖羲所治

水經曰渭水東經陳倉縣西酈氏引滎氏開山圖注曰伏羲生
成紀徙治陳倉也非陳國所建也

神農所生

世本炎帝姜姓 帝王世紀曰炎帝神農氏姜母安登遊華陽

感神而生炎帝長於姜水

按今縣南有姜水南流注渭酈元注渭水不知遂以會杜之岐水當之而謂岐水流經姜氏城南爲姜水復自知其不確乃曰疑卽杜水矣 通志岐水在岐山縣北 寰宇記原出麟遊普潤里東南流入漆水

黃帝都焉

路史疏仡紀有熊氏少典之子王承墳而土行色尙黃天下號之黃帝身五十二戰而天下大服乃達四面廣能賢精功務法秉教乘剛而都於陳注曰今寶雞故陳倉姚睦云黃帝都陳倉非宛邱故今隴右黃帝遺跡甚多